

Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliassaannartut attuumassuteqarunnaartillugu, annerusumik inuussutissarsiutitut akuerisaanerulersissinnaanera pillugu apeqquteqaat aallaavigalugu oqallissiaq.

(Aqqalu Jerimiassen, Inatsisartunut ilaasortaq)

Akissuteqaat

(Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Naalakkersuisut qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliassaannartut attuumassuteqarunnaartillugu, annerusumik inuussutissarsiutitut akuerisaanerulersissinnaanera pillugu apeqquteqaat aallaavigalugu oqallittoqarnissaanik Inatsisartuni ilaasortap Aqqalu Jerimiassenip Atassummeersup siunnersuutaanut qujaniarput.

Eqqumiitsuliornerup inuussutissarsiutinngorsinnaaneranut tunngatillugu apeqqummik soqutiginaatilimmik siunnersuuteqartoq saqqummiussaqqarpoq. Eqqumiitsulioriaatsini tamani eqqumiitsuliullaqqissunik peqarpugut, Naalakkersuisullu tamakkununga atugassarititaasut tapiissuteqartarnermullu aqqissuussinerit tamakkiissuunissaanik soqutigisaqarput.

Nuannaarutigeqisannik Kalaallit Nunaanni Eqqumiitsuliornermut Aningaasaateqarfik pillugu Nalunaarut Naalakkersuisuninngaanniit aggustimi akuersissutigineqarpoq, taamaalineranilu Kalaallit Nunaanni eqqumiitsuliornermut aningaasaateqarfiup siulliup pilersinnissaa aallartinneqarpoq. Siulersuisut septembarimi ataatsimiittoqarnerani inissitsiterput, siulersuisullu ukiumi nutaami qinnuteqaatinik tigooraalernissaminnut piareersimaniarlutik eqqumiitsuliornermut aningaasaateqarfiup pilersinnissaanik piareersaallutik aallarereerput. Naalakkersuisut neriuteqarluarput, aningaasaateqarfiullu eqqumiitsuliornermut iluaqutaallualernissaa ilimagilluinnarlugu. Naalakkersuisut eqqumiitsuliornermut aningaasaateqarfik suleqatigiumavaat eqqumiitsuliornermut tapiissuteqartarnernik aqqissuussinerit naleqqussarneqarnissaat pisariaqassappat. Tamanna ilaatigut isigineqassaaq naalakkersuinikkut anguniakkaniit, eqqumiitsuliorneq annertunerujartortumik akuerineqassasoq inuussutissarsiutitut, taamalu eqqumiitsuliornermut amerlanerusut inuussutigisinnaasaattut.

2022-mut aningaasanut inatsisissatut siunnersuutip suliarineranut atatillugu 2022-mi 2023-milu kulturi oqaatsillu pillugit isumasioqatigiissitsinissap ingerlannissaanut Naalakkersuisut aningaasaliissutissanik siunnersuuteqarput. Ilaatigullu eqqumiitsuliornermut kulturimullu suliassaqqarfimmi killiffik aammalu suliassaqqarfiup iluani ineriartortitsiffiusinnaasut pillugit oqallittoqarnissaa siunertaralugu kulturi pillugu isumasioqatigiissitsinissanut soqutigisallit attuumassutillit katersuutsinnissaanik Naalakkersuisut kissaateqarput. Isumasioqatigiissitsinerit eqqumiitsuliornerup inuussutissarsiutitut siuarsaaffiginissaanik qitiutitsiffiunissaat eqqarsaataavoq.

Eqqumiitsuliortut allat assigalugit eqqumiitsuliortut inuussutissarsiummik ingerlatsisutut akuerineqarnissaat Naalakkersuisut isumaqatigisorujussuaat. Sapinngisamik inuussutissarsiutinik amerlasuunik assigiinngisitaartunillu peqarnissarput pingaaruteqarpoq. Taamaammallu Nunatsinni inuussutissarsiutigalugu eqqumiitsuliortuusinnaaneq ajornannginnerusariaqarpoq.

Nunarput tamaat isigalugu, kisiannili aamma inunnt ataasiakkaanut eqqumiitsuliornermik ingerlataqartunuinnaanngitsoq aammali eqqumiitsuliortunik pikkorissunik pissarsisartunut tunngatillugu, eqqumiitsuliorneq pingaaruteqartorujussuullunilu inuussutissarsiorfiuvoq. Tamannalu inuussutissarsiutaavoq suleruluttarnissamik, piumassuseqarnissamik sulerusussusermillu piumasaqarfiusartoq.

Naalakkersuisut nipilersortartut ilinniarfissaannik pilersinnissaanut periarfissanik misissuipput. Ilinniarnerup piginnaasanik pilersitsiffiusarnissaa, nunatsinnilu kommunini nipilersornermik ilinniarfinni atorfinitsinneqarsinnaanermut periarfissaqarnissaa eqqarsaataavoq.

Naalakkersuisut kalaallit eqqumiitsuliaannut eqqumiitsuliortunullu tunngatillugu nunarsuaq tamaat isigalugu eqqarsartoqartariaqartoq isumaqarput. Greenlit assersuutitut taaneqarsinnaavoq, taannalu kalaallit atuakkiaannut allaffiuvoq nunani allani kalaallit atuakkiaasa siuarsarnissaannik suliaqartoq. Taakkua oktobarimi Tysklandimi nunarsuaq tamakkerlugu atuakkianik saqqummersitsinermi peqataasimapput atuakkianillu toqqakkanik nunani allani saqqummersitsisarfinnut nittarsaassisimallutik, taamaaliornikkut kalaallit atuakkiaat nunat allamiut oqaasii assigiinngitsut aqqutigalugit saqqummersinneqarsinnaassammata.

Tamatuma saniatigut eqqumiitsuliornermut tunngatillugu Canadamik suleqateqarnerulernissamut Naalakkersuisut sulissuteqarusupput.

Taamatut oqaaseqarlunga inersuarmi oqallittoqarluarnissaanut Naalakkersuisut qilanaarput.